



PETIKAN AKHBAR

Bernama - Kerajaan Bertindak Pantas Sediakan Ruang Fiskal Ketika Krisis

PETIKAN AKHBAR | 06 NOVEMBER 2020



KUALA LUMPUR, 6 Nov - Kerajaan yang bertanggungjawab perlu sentiasa proaktif dan pantas dalam menyediakan ruang fiskal untuk melaksanakan langkah bagi melindungi keselamatan dan memastikan kesejahteraan rakyat dalam tempoh krisis.

Kementerian Kewangan (MoF) berkata penggubalan Akta COVID-19 merupakan inisiatif kerajaan menangani impak negatif sosio-ekonomi akibat pandemik ini dalam kerangka perundangan dengan tambahan fleksibiliti dan tadbir urus baik.

"Memandangkan akta ini bersifat sementara, kerajaan perlu meneruskan semula langkah penggabungan fiskal selepas krisis ini berakhir bagi memastikan kemampuan kewangan awam dalam jangka masa panjang," kata MoF dalam laporan Tinjauan Fiskal dan Anggaran Hasil Kerajaan Persekutuan 2021.

Laporan tersebut dikeluarkan sempena pembentangan Bajet 2021 oleh Menteri Kewangan Tengku Datuk Seri Zafrul Abdul Aziz.

Antara langkah yang diperkenalkan di bawah Akta COVID-19 adalah meningkatkan had siling jumlah hutang di bawah Akta Pinjaman (Tempatan) 1959 (Akta 637) dan Akta Pendanaan Kerajaan 1983 (Akta 275) sehingga 60 peratus daripada 55 peratus daripada keluaran dalam negeri kasar (KDNK).

Akta COVID-19 telah diluluskan oleh Dewan Rakyat pada 24 Ogos 2020 dan Dewan Negara pada 21 Sept 2020.

Kementerian Kewangan berkata peningkatan aras hutang hanya bersifat sementara bagi tempoh tiga tahun sehingga 31 Dis, 2022, dan tempoh ini menyediakan masa yang mencukupi untuk kerajaan kembali melaksanakan langkah penggabungan fiskal dan mematuhi had siling hutang asal.

“Hutang kerajaan persekutuan adalah berjumlah RM874.3 bilion atau 60.7 peratus daripada KDNK sehingga akhir September 2020. Daripada jumlah ini, 96.7 peratus adalah terdiri daripada sekuriti dalam bentuk ringgit manakala selebihnya adalah dalam mata wang asing,” kata MoF.

Sementara itu, hutang dalam negeri meningkat kepada RM845 bilion berbanding RM764.2 bilion pada akhir 2019, meliputi Sekuriti Kerajaan Malaysia (MGS) sebanyak RM436.6 bilion dan Terbitan Pelaburan Kerajaan Malaysia (MGII) yang berjumlah RM360.3 bilion.

MoF berkata kertas MGS kekal sebagai instrumen utama pinjaman merangkumi 49.9 peratus daripada jumlah hutang kerajaan persekutuan manakala MGII merekodkan bahagian yang signifikan sebanyak 41.2 peratus.

Pinjaman luar pesisir, yang merangkumi sekuriti pasaran dan pinjaman projek, kekal stabil pada RM29.3 bilion - di bawah had berkanun iaitu RM35 bilion, katanya.

Kementerian berkata caj perkhidmatan hutang adalah pada RM34.5 bilion atau 15.4 peratus daripada jumlah keseluruhan pendapatan kerajaan pada tahun ini.

Jumlah tersebut adalah lebih tinggi daripada jangkaan asal pada 14.3 peratus semasa pembentangan Bajet 2020.

-- BERNAMA

 [Siaran Media](#)

 [Koleksi Ucapan](#)

 [Petikan Akhbar](#)

 [Foto](#)

 [Video](#)

 [Pengumuman](#)

POPULAR TAGS

[BERNAMA](#)

[HARGA MINYAK](#)

[PRICE OF PETROLEUM](#)

[TENGKU ZAFRUL](#)

[BANTUAN PRIHATIN NASIONAL](#)

[KWSP](#)

[I-SINAR](#)

[SINAR HARIAN](#)

[JELAJAH BELANJAWAN 2021](#)

[PRIHATIN MOF](#)

[PERMAI](#)

[BERITA HARIAN](#)